

PROJETU PESKIZA: DIJITALIZA NO ANALIZA ISTÓRIA KBIIT KOMUNIDADE SIDADE DILI HASORU DEZASTRE

SUMÁRIU PESKIZA



EKIPA PESKIZA

Universidade Melbourne:

Professor Lisa Palmer

Dr Kirsty Sword Gusmão

Associate Professor Mark Quigley

Fundasaun Alola:

Ms Maria Imaculada Guterres

Ms Beatriz Sequeira

Ms Pascoela Barreto

02

KONA-BA PESKIZA NE'E

Entre fulan Maiu no Julu 2022, ekipa peskiza husi Fundasaun Alola no Universidade Melbourne hala'o entrevista ho feto no mane na'in-20 husi Masilidun, Manleuana no Hera. Komunidade sira ne'e mak hetan impaktu maka'as husi inundasaun ne'ebé akontese iha Dili iha Abril 2021. Objetivu husi peskiza ne'e mak atu hatene kle'an kona-ba sira-nia esperiénsia hasoru dezastre naturál no surtu Covid-19, sira-nia situasaun agora, esperansa no planu ba futuru.

Klik iha ne'e ka loke kódigu QR iha sorin hodi haree filme peskiza.



03

SUMÁRIU REZULTADU PESKIZA

1.

Entrevista sira foka atensaun ba oinsá dezastre naturál sira hanesan inundasaun bele fó impaktu negativu tebes ba comunidade sira ne'ebé vulnerável ona no aumenta todan no kiak ba ema kbiit-laek sira. Iha entrevista 20 hotu, mane no feto sira deskreve sira-nia luta loroloron atu buka moris. Sira mós deskreve sira-nia susar tanba lakon uma no sasán uma laran hotu, inklui membru família iha kazu balu.

2.

Tanba ema ne'ebé partisipa iha entrevista sira barak liu mak simu ona apoiu husi Fundasaun Alola durante periodu emerjénsia, resposta ba pergunta sira foka liu ba sira-nia esperiénsia hasoru eventu inundasaun iha fulan Abril 2021 no família sira-nia nesesidade imediatu sira duké sira-nia nesesidade prazu naruk nian.



04

3.

Entre partisipante peskiza ne'e hotu iha rekoñesimentu jerál katak comunidade sira presiza hola medida preventivu hodi evita impaktu negativu liu husi dezastre sira iha futuru, maibé maioria ema parese laiha meius atu hasees-an husi perigu. Partisipante hotu-hotu sei hein hela asisténsia ne'ebé autoridade sira promete ba sira. "Ami la bele prepara an di'ak liu ba dezastre sira ne'ebé karik sei akontese aban bainrua se la iha ajuda ruma - ami presiza ai, besi no sementi maibé to'o ohin ami hamutuk ho família sanulu tan seidak simu buat ida." (Marta, Manleuana). Sira hotu la hatene atu bá loos iha ne'ebé iha Dili. Partisipante balu ko'alia kona-ba trauma ne'ebé sira hasoru bainhira sira rona udan iha kalan boot.

4.

Enkuantu partisipante balu iha área afetadu sira simu ona materiál konstrusaun hodi fasilita sira fila ba sira-nia aldeia iha foho, sira no peskizadór sira husi Fundasaun Alola mós fó komentáriu katak opsaun ne'e ladún viavel tanba ekonomia formál ne'ebé fraku tebes iha área rurál sira. Ema balu rai materiál konstrusaun iha sira nia aldeia no tuirmai fila ba Dili hodi hela iha fatin ne'ebé risku boot ba dezastre naturál no continua buka moris iha ne'ebá tanba iha promessa edukasaun ho kualidade di'ak liu. Realidade triste ida-ne'e mak rezultadu falta koordinasaun entre autoridade sira ne'ebé iha responsabilidade atu fornese asisténsia no asecura katak sistema planeamentu uza rai konsidera risku dezastre naturál nian.



05

5.

Meiu atu evita risku dezastre ne'ebé partisipante barak liu temi mak desloka ba fatin iha Dili laran ne'ebé seguru liu, por ezemplu fatin sira ne'ebé dook uituan husi mota. Maski nune'e, partisipante sira la iha asesu ba rai iha fatin seluk no falta mós meius atu muda ba fatin seluk. Sira la simu informasaun klaru husi autoridade sira kona-ba fatin ne'ebé sira atu muda ba no sira ladún fó atensaun ba risku no dezafiu sira ne'ebé karik sira sei hasoru hanesan rezultadu husi desloka ba fatin foun. Maioria husi partisipante sira husu de'it ba autoridade sira atu muda sira ba fatin ne'ebé seguru liu. Feto ida halo reflesaun kona-ba mudansa iha ambiente ne'ebé nia hetan durante hela iha Masilidun: "Ami presiza koko atu hadook-an husi fatin risku aas hanesan ne'e. Iha fatin hanesan ne'e, bee sai maka'as no ami arraska atu sai mós tanba bee taka dalan hotu. Uluk bainhira mota sa'e ami la kona, maibé agora bee mota tama uma.



6.

Partisipante barak liu husi ema na'in ruanulu espresa sira-nia hakarak atu hela iha Dili maski iha risku boot ba sira-nia moris no kbiit atu buka moris. Razaun ne'ebé ema baibain temi mak sira-nia persepsaun katak fasil liu buka moris hodi han no suporta oan sira nia edukasaun iha sidade. "Iha foho ami bele moris husi rai hodi evita hamlaha maibé rai osan ba buat ne'ebé la'ós nesesidade urjente loroloron nian arraska tebes."



7. Partisipante sira ko'alia kona-ba nesesidade atu muda bá-mai husi sidade ba área rurál sira hodi hala'o atividade kulturál no lia liga ba agrikultura no rai. Kontribuisaun osan liga ba lia sai todan ba família kbiit laek sira, maibé ekipa Fundasaun Alola temi katak iha mós benefísiu sosiál, kulturál nomós ba saude husi sira-nia partisipasaun iha rituál sira ne'ebé ema barak konsidera hanesan obrigasaun.
8. Rekomendasaun ida ne'ebé partisipante barak tebes ható'o mak kona-ba nesesidade governu bele trata vítima dezastre sira ho dignidade liuhusi fornese akomodasaun emerjénsia ne'ebé seguru, moos no boot natoon nomós liuhusi kria no implementa solusaun longu-prazu nian hanesan família sira muda ba fatin foun.
9. Partisipante sira hotu ko'alia kona-ba oinsá inundasaun iha Abril 2021 no surtu Covid-19 fó impaktu negativu tebes ba sira no ema vulnerável seluk iha sira-nia sosiedade, inklui sai barreira ba sira atu asesu ba servisu sosiál, saude no empregu. Inan balu relata katak sira-nia oan simu vasinasaun tarde tanba dezastre naturál no medida prevensaun Covid sira ne'ebé limita sira-nia mobilidade.